

Акафист Воскресению Христову

Кондак 1

Возбранный Воеводо, Господи Небесе и земли, победно благодарственное пение приносим Тебе, раби Твои, во ад ныне сшедшему и с Собою вся воскресившему, и наше избавление празднующе, светло вопием:

Христос воскресе из мертвых, смертью смерть поправ и сущим во гробех живот даровав.

Икос 1

Ангел Господень, в вечер субботний в трусе велии сошед с Небесе, отвали камень от дверей гроба Иисусова и сидяще на нем. От страха его сотрясошася стрегущии и быша яко мертви. Мы же Воскресшему Живому Богу с мироносицами покланяемся и Пасху тайную благовествуем, вопиюще:

Христос воскресе, и князи адстии падоша; Христос воскресе, и устрашишася вратницы адовы.

Христос воскресе, и сокрушишася врата медная; Христос воскресе, и твердыни адовы положишася в заустение.

Христос воскресе, и смерть рыдает; Христос воскресе, и ад, стена, вопиет:

Христос воскресе из мертвых, смертью смерть поправ и сущим во гробех живот даровав.

Кондак 2

Видяще Мария Магдалина, и Мария Иаковля, и Саломия юношу во гробе Иисусове, одеяна во одежду белу и сидяща в десных, ужасошася. Он же глагола к ним: «Иисуса Распятого ищите? Несть zde, воста бо, якоже рече. Приидите, видите место, идеже лежа

Господь, и скоро шедше рцыте учеником Его:

Христос воскресе из мертвых, смертию смерть поправ и сущим во гробех живот даровав».

Икос 2

Разум неразумемаемый разумети ищуще, Петр и другий ученик течаства ко гробу и, вшедше в онь, видеша ризы едины лежаща и сударь, иже бе на главе Иисусове, не с ризами лежащъ, но особь свит на едином месте, веровавшие же, возопиша с веселием:

Христос воскресе, и вся тварь радуется; Христос воскресе, небеса да веселятся;

Христос воскресе, и сликовствуют нам Ангели; Христос воскресе, и просветишася преисподняя

Христос воскресе, воспойте праведных души, из ада свободшеся; Христос воскресе, воскликнем с веселием, от смерти спасеннии. Пойте же Господеви вся земля:

Христос воскресе из мертвых, смертию смерть поправ и сущим во гробех живот даровав.

Кондак 3

Силою свыше облече Господь Своя ученики по Воскресении. Тии же идоша в Галилею, в гору, аможе повеле им Иисус, и пришедшим им глагола Иисус: «Дадеся Ми всяка власть на Небеси и на земли. Шедше убо, научите вся языки, крестяще их во имя Отца и Сына и Святаго Духа, учаще их блюсти вся, елика заповедах вам». Тии же поклонишася Ему, зовуще:

Христос воскресе из мертвых, смертию смерть поправ и сущим во гробех живот даровав.

Ин Кондак 3

Силою Божественною воскресивый Лазаря, воскреси и мене, истлевшаго страстьми и многолетно лежаща во гробе нераскаяния, да, востав по гласу Твоему, воспою, спасаемый:

Христос воскресе из мертвых, смертию смерть поправ и сущим во гробех живот даровав.

Икос 3

Имущи в сердце своем любовь к Учителю, Мария Магдалина стояше у гроба вне, плачущи, и Воставшаго из мертвых видящи, яко вертоградаря, вопрошаше: «Аще Ты еси взял Его, повеждь ми, где еси положил Его, и аз возьму Его». Обаче, паче чаяния, слышавши: «Марие, восхожду ко Отцу Моему и Отцу вашему и Богу Моему и Богу вашему», прииде ко учеником, глаголющи:

Христос воскресе, и жало греховное притупися; Христос воскресе, и мир от потопа греховнаго спасесе.

Христос воскресе, и мы от работы врагу свободихомся; Христос воскресе, и диаволе прельщение упразднися.

Христос воскресе, и бывшее на нас рукописание загладися; Христос воскресе, и вся тварь обновися, зовущи:

Христос воскресе из мертвых, смертию смерть поправ и сущим во гробех живот даровав.

Кондак 4

Бурю помышлений сумнительных внутрь имея, Фома учеником, глаголющим, яко видехом Господа, рече им: «Аще не увижу на руку Его язвы гвоздиныя и вложу перста моего в язвы гвоздиныя, и вложу руку

в ребра Его, не иму веры», но, уверився, с веселием возопи: Христос воскрес из мертвых, смертью смерть поправ и сущим во гробех живот даровав.

Икос 4

Слышав Фома ученик, видевших Господа, и очима своима хотяй Того зрети, рече: «Не иму веры». По днех же осьмих прииде Иисус затворенным дверем, ста посреде ученик и глагола Фоме: «Принеси перст твой семо, и виждь руце Мои, и принеси руку твою, и вложи в ребра Моя: и не буди неверен, но верен». И отвеща Фома, и рече:

Христос воскрес, Ты еси Господь мой; Христос воскрес, Ты еси Бог мой.

Христос воскрес, и вси нетление и жизнь восприяхом; Христос воскрес, и мертвии восташа.

Христос воскрес, и избавихомся осуждения и муки; Христос воскрес, и жизнь из гроба возсия миру поющему:

Христос воскрес из мертвых, смертью смерть поправ и сущим во гробех живот даровав.

Кондак 5

Божества огнем не опалися Фома, ребро Спасово дерзновенно осязав. Паче же просветися, Бога, на спасение наше воплотившася и паки с плотию воскресшаго, познав. Темже неверием своим блаженный Ближец церковную веру утверждает, юже исповедующе согласно вопием:

Христос воскрес из мертвых, смертью смерть поправ и сущим во гробех живот даровав.

Икос 5

Видевше Иисуса воскресша, ученицы убояхуся,

мняще дух видети. Иисус же, хотя уверити их, показа им руце и нозе и ребра Своя, таже рыбы печены часть прием и от пчел сот пред ними яде. Тем уверившеся и страх свой и печаль свою отложивше, в радости пояху:

Христос воскресе, хуждшая восприим, и подаде нам лучшая; Христос воскресе, и ад умертвися блистанием Божества Его.

Христос воскресе, и тьма разрушися, и мрачнии демони отгнашася; Христос воскресе, и истлевшее страстьми человеческое естество обновися.

Христос воскресе, и беззакония наша туне очистишася; Христос воскресе, и мы вси, в нетление облекшеся, песнь сию Ему приносим:

Христос воскресе из мертвых, смертию смерть поправ и сущим во гробех живот даровав.

Кондак 6

Проповедники по Воскресении Твоем в мир посылая, богоносныя апостолы Твоя, Христе, рекл еси им, дунув: «Приимите Дух Свят. Имже отпустите грехи, отпустятся им: и имже держите, держатся». Темже даже и до днесь во всем мире чада церковная, от грехов разрешаемы, славят непрестанно Твое милосердие и душами чистыми в радости поют:

Христос воскресе из мертвых, смертию смерть поправ и сущим во гробех живот даровав.

Икос 6

Возсиял еси, Христе, и во мрачных удолиах ада свет Твоего Воскресения, прощение, и ослабу, и избавление благовествуя, Многомилостиве, душам от века тамо содержимым. Темже от змия,

человекоубийцы, исхищаеми, играюще, к свету Твоему устремися, поюще:

Христос воскресе, и узы наша растерзашася; Христос воскресе, и сень смертная в вечную жизнь преложися.

Христос воскресе, и держава смерти уже не возможет держати человека; Христос воскресе, и мучителя дерзость низложися.

Христос воскресе, и рай вместо ада жити нам даровася; Христос воскресе, и мир воспевае присно:

Христос воскресе из мертвых, смертию смерть поправ и сущим во гробех живот даровав.

Кондак 7

Хотяй падшему Адаму послужити, Спасе наш, на земли явился еси, и на земли того не обрет, даже до ада низшел еси ища, да, сретив Тя долу, в преисподних земли, со всеми спасаемыми поет:

Христос воскресе из мертвых, смертию смерть поправ и сущим во гробех живот даровав.

Икос 7

Новыя жизни начало положил еси миру, Господи, Твоим славным Воскресением. Ветхая бо вся мимоидоша: и ад, и смерть, и властительство диавола. Свободна убо вся тварь познавается, и прежде омраченнии, ныне яко сынове Божии, ликуют, поюще:

Христос воскресе, бездну милости и щедрот изливав на род наш; Христос воскресе, в ров низпадших нас воздвигнувый с Собою.

Христос воскресе, и мы от сетей демонских избавихомся; Христос воскресе, и горесть греха в сладость райския жизни преложися.

Христос воскресе, и дровом умерщвлении ожихом;
Христос воскресе, и нас возведе в прежнее достояние
да зовем:

Христос воскресе из мертвых, смертию смерть
поправ и сущим во гробех живот даровав.

Кондак 8

Странствуя с Клеопою и Лукою в весь, отстоящую
стадий шестьдесят от Иерусалима, и не познан быв
има, поносил еси, Спасе, неверствию их и
жестосердию, глаголя: «Не сия ли подобаше
пострадати Христу и внити в славу Свою?» И, начен
от Моисея и от всех пророк, научил еси их пети:

Христос воскресе из мертвых, смертию смерть
поправ и сущим во гробех живот даровав.

Икос 8

Всего Себе, Бога суща и человека совершенна,
преподал еси, Спасе, двема ученикома Твоима во
Еммаусе, егда приимь хлеб, благословил еси и,
преломив, дал еси има. Онема и отверзостеся очи, и
познаста Тебе, Ты же невидимь бысть има, и рекоста
к себе:

Христос воскресе, и жизнь воцарися; Христос
воскресе и диаволя леть обличися.

Христос воскресе, и преста жертва идольская;
Христос воскресе, и вся земля приносит Ему жертву
хваления.

Христос воскресе, и мы, вкусивше древле
преслушаннаго брашна, ныне вкушаем пици
вечныя; Христос воскресе, и мы радости
присносущныя причастницы бываем, поюции:

Христос воскресе из мертвых, смертию смерть

поправ и сущим во гробех живот даровав.

Кондак 9

Вси Ангели, Христе Спасе, Твое Воскресение поют на небеси. Сподоби и нас на земли чистым сердцем в веселии воспевати:

Христос воскресе из мертвых, смертию смерть поправ и сущим во гробех живот даровав.

Икос 9

Ветия всемирный и учитель языков Павел богоглаголивый, яко труба, вопиет: «Христос воскресе от мертвых, Начаток востания умерших бысть. Якоже во Адаме вси умирают, такожде и о Христе вси оживут». Темже Воскресение Христово видевшие, в радости вопием:

Христос воскресе, и князь мира низложися; Христос воскресе, и трепещет преисподняя.

Христос воскресе, и смерть пожерта бысть победою; Христос воскресе, и ад пленен бысть Того державою.

Христос воскресе, и свободихомся от адовых нерушимых уз; Христос воскресе, и мы, из нетления избавльшеся, сыны воскресения явихомся, и поем:

Христос воскресе из мертвых, смертию смерть поправ и сущим во гробех живот даровав.

Кондак 10

Спасти хотя род человеческий от работы вражия, распятие и смерть претерпел еси, Господи, погребен же быв, в третий день от мертвых востал еси. Тем же Ангел, блистаяся во гробе, благовествует женам, глаголя:

Христос воскресе из мертвых, смертию смерть поправ и сущим во гробех живот даровав.

Икос 10

Третье по Воскресении явился Иисус на мори Тивериадстем рыбу ловящим Симону Петру, и Фоме, и Нафанаилу, и сыном Зеведеевым со инема от ученик Его двема и, яко Владыка всех, повелевает мрежу одесную страну корабля воврещи, и бысть слово дело вскоре, и многое рыб множество, и вечера странна готова на земли. Ея же ныне мысленно насладитися и нас сподоби, Господи, поющих:

Христос воскресе, и дадеся Ему власть на небеси и на земли; Христос воскресе, и Царство Божие наста.

Христос воскресе, и Тело Его, яко Хлеб Жизни, вси приемлем; Христос воскресе, и Крови Его, яко Источника Безсмертнаго, вкушаем.

Христос воскресе, и Адам, свободен, с нами ликует; Христос воскресе, и Ева, от уз избавляема, радуется, зовущи:

Христос воскресе из мертвых, смертию смерть поправ и сущим во гробех живот даровав.

Кондак 11

Пение всеумиленное приношаше Воскресшему Тебе, Петр, трици бо отвержеся Тебе, трици же и исповедуя: «Господи, Ты вся веси, Ты веси, яко люблю Тя». Трици и слышит от Тебе сладчайшее на паству паки призвание: «Паси агнцы Моя, паси овцы Моя». Темже и зовет:

Христос воскресе из мертвых, смертию смерть поправ и сущим во гробех живот даровав.

Икос 11

Света Подателю, якоже солнце, возсиял еси тридневно от гроба и вся просветил еси светом

истиннаго богопознания. Темже сидящи во тьме неверия и сомнения уверихомся со апостолы, яко Господь еси, и не истязуем уже: «Ты кто еси?» Но Воскресшаго Тя славяще, во умилении зовем:

Христос воскресе, и всяческая просвети Воскресением Своим; Христос воскресе, и свет вечный возсия во тьме и сени смертной сидящим.

Христос воскресе, и верным подаде тайно осеняющее свыше Духа сияние; Христос воскресе, и духовная очеса прежде слепых отверзошася.

Христос воскресе, и мы Отца светов познахом; Христос воскресе, да посрамятся вси отвергшиися Господа славы и с нами да воспоят:

Христос воскресе из мертвых, смертью смерть поправ и сущим во гробех живот даровав.

Кондак 12

Благодатию Твоею всякому человеку удобнейший путь спасения указуя, Христе, глаголал еси Симону Петру: «Егда состареешися, воздежеши руце твои, и ин тя. пошлет и ведет, а може не хощеши», назнаменуя, кою смертью прославит Бога. Возлюбленному же ученику повелел еси пребывати, дондеже приидеши. Темже, аще и разлучившеся апостоли, обаче союзом любви связуеми, согласно воспеваху:

Христос воскресе из мертвых, смертью смерть поправ и сущим во гробех живот даровав.

Икос 12

Поюще Твое тридневное Воскресение, Христе, радуемся Твоему непреложному обещанию. С нами бо до скончания века быти обещался еси, от всякаго зла

нас избавляя и к жизни вечной руководствуя. Сего ради, славяще Тя, вопием:

Христос воскресе, и мы вреда всякаго избавляемся ныне; Христос воскресе, и нас одесную Отца с Собою посадил есть.

Христос воскресе, и нас причастники вечныя славы Своея содела; Христос воскресе, и древле сокрушивый праотца сильный враг сокрушися.

Христос воскресе, и со Ангелы мы, прежде отринувеннии, водворяемся; Христос воскресе, и с Собою вся воскресит, зовущия:

Христос воскресе из мертвых, смертью смерть поправ и сущим во гробех живот даровав.

Кондак 13

О Пасха велия и священнейшая, Христе Иисусе, Спасителю наш, благодарно исповедуем спасительную великую милость Твою, яко и паки сподобил еси нас, недостойных, ныне вкусити радости Светлаго Воскресения Твоего. Подавай нам в невечернем дни Царствия Твоего истее и совершеннее Тебе, Сладчайшаго причащаться, да со Ангелы и всеми святыми во веки веков поем вси радостно:

Христос воскресе из мертвых, смертью смерть поправ и сущим во гробех живот даровав.

Этот кондак читается трижды. Затем икос 1 и кондак 1.

Икос 1

Ангел Господень, в вечер субботний в трусе велии сошед с Небесе, отвали камень от дверей гроба Иисусова и сидяще на нем. От страха его сотрясошася стрегущии и быша яко мертви. Мы же Воскресшему

Живому Богу с мироносицами покланяемся и Пасху тайную благовествуем, вопиюще:

Христос воскресе, и князи адстии падоша; Христос воскресе, и устрашишася вратницы адовы.

Христос воскресе, и сокрушишася врата медная; Христос воскресе, и твердыни адовы положишася в запустение.

Христос воскресе, и смерть рыдает; Христос воскресе, и ад, стена, вопиет:

Христос воскресе из мертвых, смертью смерть поправ и сущим во гробех живот даровав.

Кондак 1

Возбранный Воеводо, Господи Небесе и земли, победно благодарственное пение приносим Тебе, раби Твои, во ад ныне сшедшему и с Собою вся воскресившему, и наше избавление празднующе, светло вопием:

Христос воскресе из мертвых, смертью смерть поправ и сущим во гробех живот даровав.

Акафист Воскресению Христову иной

Кондак 1

Взбранный Воеводо и Господи, вечныя смерти Победителю, яко избавлься от духовнаго умерщвления, похвальная восписую Ти, возсозданный Тобою раб Твой. Ты же, яко имеяй победу над смертию, от смерти греховныя свободи нас зовущих:

Иисусе воскресший, воскреси души наша!

Икос 1

Ангелы воскресение Твое, Христе Спасе, непрестанно поют на небесех, и нас на земли сподоби чистым сердцем воспети Тебе сице:

Иисусе непостижимый, всех верных просвещая, просвети и мя заблудшаго; Иисусе воскресший, всех Собою оживляяй, оживи мя умерщвленнаго грехами.

Иисусе, на небо вознесыйся и возносяй на Тя надеющихся, совознеси и мя долу преклоннаго; Иисусе, седяй одесную Отца и разделяяй славу с любящими Тя, не лиши мя славы Твоея.

Иисусе, хотяй прийти судити живым и мертвым, не осуди мя по делом моим, но сотвори со мною по милости Твоей.

Иисусе воскресший, воскреси души наша!

Кондак 2

Видя падших человеков, Господи, Ты вочеловечився совоскресил еси всех и воскресив, даровал вся потребная ко спасению: сице и мене умерщвленнаго грехми оживи, зовуща: Аллилуиа.

Икос 2

Разум не постигает тайны Божественныя, яко

Источник жизни воскресает, умерщвляя смерть. Сего ради, точию сердцем испытующе радость воскресения и тою просвещаемы, со гласом веселия духовнаго зываем Ти сице:

Иисусе, входяй дверем заключенным, вниди в дом души моея; Иисусе, сретивый ученики на пути, срящи и мя на пути сей жизни.

Иисусе, воспламенивый сердца их Твоими словесы, воспламени и мое хладное сердце; Иисусе, давый Себе познати в преломлении хлеба, даждь ми познати Тя в Божественной Евхаристии.

Иисусе, обещаый Духа Святаго учеником Твоим, низпосли и мне Сего Духа Утешителя от Отца.

Иисусе воскресший, воскреси души наша!

Кондак 3

Силою Божественною воскресивый Лазаря, воскреси и мене истлевшаго страстьми и многолетно лежащаго в гробе нераскаяния, да возстав по гласу Твоему, воспою спасаемый: Аллилуиа.

Икос 3

Имеяй власть над смертию, из ада души вызвал еси, Иисусе. Воззови и мене из глубины греховныя, да и аз, очистив чувства, блистающу Ти во свете неприступнем, радостно воспою победную песнь тако:

Иисусе, смерти Победителю, победи моя злыя страсти; Иисусе, жизни Подателю, даждь ми жизнь спасительную.

Иисусе, источниче радости, возвесели сердце мое во истине Твоей; Иисусе, пятию хлебы пять тысяч насытивый, хлебом небесным напитай мя.

Иисусе, надежде падших, изми мя из рова зол моих.

Иисусе воскресший, воскреси души наша!

Кондак 4

Буря страстей смущает и потопляет мя, но молю Тя, Иисусе: яко Петру, простри ми руку помощи, и, силою воскресения Твоего воздвигнув мя, научи воспевати: Аллилуиа.

Икос 4

Слышащи радостную весть воскресения Твоего, Иисусе, небеса достойно веселятся, земля же радуется: и мы, празднующе вечное веселие, дерзаем зывати Тебе сице:

Иисусе, седяй во свете неприступнем, буди доступен всем по милосердию Твоему; Иисусе, любяй создания Твоя, не забуди и мене последняго.

Иисусе, влекий к Себе сердца, смягчи и мое окаянное сердце; Иисусе, вся благая прошения исполняяй, исполни и мое прошение, во еже паче всего любити Тя.

Иисусе, всяку каплю слезную приемляй, не отрини моих молений.

Иисусе воскресший, воскреси души наша!

Кондак 5

Благоприятная жизнь источается от Тебе, о, Иисусе, Сыне Бога живаго! Сего ради молю Тя, да не погубит мя человекоубийца и да не заградит уста моя, вопиющая Тебе: Аллилуиа.

Икос 5

Видевше духом воскресшаго Господа, приидите, пиво прием новое, не от камене истекшее, но от источника нетленного и живоноснаго гроба Спасителя, имже бесплодную землю душ наших

одождив, научи всех пети Ему сице:

Иисусе, напаяяй нас Своею Кровию, даруй мне неоскудно приимати пречистую Кровь сию; Иисусе, ниспослаяй дождь на праведныя и грешныя, ороси и мя к плодоношению духовному.

Иисусе, не возгнушавыйся грешницы покаявшаися, даждь и мне нози Твои омыти слезами благодарения; Иисусе, рекший Фоме: блажени не видевшии, но веровавшии, даждь ми веру нелицемерную.

Иисусе, рекий: «ищите и обрящете», даруй ми обрести Тя единого на потребу.

Иисусе воскресший, воскреси души наша!

Кондак 6

Проповедуяй в душе неумолкающего радования Твое живоносное воскресение, Иисусе Боже мой, да буду и аз грешный причастник сего воскресения, поя Тебе непрестанно в горнем Иерусалиме: Аллилуиа.

Икос 6

Возсиявый всему миру воскресением Своим, Господь Иисус Христос, ныне вся исполняет света: небо же и землю и преисподняя, да празднует убо вся тварь, Христово восстание, в нем же утверждаеми вопием сице:

Иисусе, вся исполняяй светом Твоим, просвети и мои омраченные очи; Иисусе, небо и землю сочетавай, возведи мя от земли на небо.

Иисусе, снизшедый светом Божества в преисподняя, сними в преисподнюю души моя; Иисусе, возведый из темниц адовых ожидавших Тя души, изведи и мя грешнаго из мрака уныния, яко живот мой аду приближися.

Иисусе, всем простираяй пречистеи руце Твои, обьими и мя окаяннаго.

Иисусе воскресший, воскреси души наша!

Кондак 7

Хотяй открыти силу Божества Своего, Господь покрывается печатью Каиафы, да не нарушив оныя пред стрегущими, победоносно восстанет и научит пети: Аллилуиа.

Икос 7

Дивно и непостижимо есть, како вчера спогребшийся Тебе, Христе, днесь совосстаю духом, Тебе воскресшему, и воспеваю тако:

Иисусе воскресший, всем туне жизнь подаваяй, окрыли ум мой, да Тебе последуем; Иисусе, освятивый землю Твоими стопами, освяти мысль мою к Тебе возносящуюся.

Иисусе, невозбранивый начертати пречистый образ Твой, даждь мне имети выну в души моей образ Твоего воскресения; Иисусе, принявый две лепты вдовицы, прими от мене песнь сию.

Иисусе, не осудивый блудницы, на путь истины наставив ю, не осуди и моих нечистых уст, в песнопении Тя лобызающих.

Иисусе воскресший, воскреси души наша!

Кондак 8

Странно Бога вочеловечася и воскресша мысленно видяше, всякое житейское отложим попечение, яко да Царя всех подьимем и воспоем Ему: Аллилуиа.

Икос 8

Весь был еси любовь к падшим человеком, о, Иисусе, и поставил еси на Божественней стражи

Богоглаголиваго Аввакума, да покажет светоносна Ангела, яко глаголюща о воскресении Твоем. Тем же и мы зовем Тебе сице:

Иисусе, стрегомый воинами, посли Ангела моего Хранителя на стражу души моея, его аз отгоняю грехи моими; Иисусе, ослепивый очи стрегушим Тя блистанием Божества, отврати очи мои от суеты и просвети к познанию истины.

Иисусе, вопрошавый апостола Петра: любиши ли Мя? даждь мне имети образ любви его; Иисусе, простивый апостолу тому отречение, прости и мне ежечасныя отречения от повелений Твоих.

Иисусе, давый власть вязати и решати, разреши мя от неправд моих.

Иисусе воскресший, воскреси души наша!

Кондак 9

Все естество человеческое, Тобою восприятое, прославися воскресением Твоим, Иисусе, и сего ради даруеши телесам нетление. Тем же мы, видяще сие знамение в останках святых, вопием с умилением: Аллилуиа.

Икос 9

Вития Богоглаголивыя утренюют духом, сретая Тя исходяща из гроба, и вместо мира приносят Ти песнь, яко Солнцу Правды и Владыце, с ними же наша молитвы приими сицевая:

Иисусе, приемый миро на Тя излианное приими и мною излианныя славословия; Иисусе, Солнце истины, просвети душу мою.

Иисусе, рыбаи соделавый ловцы человеков, улови и мою злую волю в Твое послушание; Иисусе, из

Савла соделавый первоверховнаго Апостола, вразуми и мя заблуждающаго.

Иисусе, молитвами Апостола сего и всех святых Твоих пощади мя грешнаго.

Иисусе воскресший, воскреси души наша!

Кондак 10

Спасти хотяй род человеческий, Иисусе, снишел еси на землю, и Бог сый восприял еси немощи наша, да и в них явится сила Твоя, подвизающая пети: Аллилуиа.

Икос 10

Царю воскресший Иисусе Христе, Спасителю наш! Ты, снишедый в преисподняя земли и сокрушивый верей вечныя, содержащия связанныя души, свободи и мене от уз греха, взывающа Тебе сице:

Иисусе, вручивый возлюбленнаго ученика Матери Твоей, вручи и мя спасительному Ея смотрению; Иисусе, страдания Матери Твоея обративый в радость, даждь и мне окаянному терпеливо понести крест мой.

Иисусе, давый миру заступницу Матерь Твою, даждь и мне грешному быти под кровом Ея; Иисусе, младенцам не возбранивый прикасатися к Тебе, даруй мне их незлобие.

Иисусе, рекий блуднице: «иди и отселе не согрешай», даждь ми к тому не прогневляти Тя.

Иисусе воскресший, воскреси души наша!

Кондак 11

Пение умиленное о воскресении Твоем даруй мне принести Тебе, о, Спасителю мой! и в нем да примет душа моя елей исцеления от душевредных мечтаний,

и да поет выну Тебе: Аллилуиа.

Икос 11

Светоприимно от воскресения Твоего восприявши лучи благодати, и чрез них яко в зеркале видяще духовное Твое живоносное возстание, покланяемся кресту Твоему честному и святое воскресение Твое поем и славим сице:

Иисусе, преклонивый небеса, прими и поклонение наше благоутробно; Иисусе, уснувший плотию яко мертв, умертви наша плотския похоти.

Иисусе, всего Себе давший на спасение человеков, даждь мне всецело предатися Тебе; Иисусе, возшедый на небеса уготовати место любящим Тя, всели и мя во обители Твоя.

Иисусе, седяй одесную Отца, десным овцам сопричти мя.

Иисусе воскресший, воскреси души наша!

Кондак 12

Благодать даждь и мне, всех возлюбивый Иисусе, и прими мое моление яко дань, приносимую Тебе, и отжени от души моя вся лукавая помышления, да неосужденно воспую Тебе: Аллилуиа.

Икос 12

Поюще Твое всеславное Воскресение величаем Тя, о, Иисусе Христе, Боже наш! и веруем яко даруеши всем живот вечный. Того ради в сей нареченный и святой день яко братия друг друга обыдем, ненавидящим нас простим вся воскресением, и едиными усты и единым сердцем возопиим Тебе тако:

Иисусе, благословляяй благословляющия Тя, благослови и ныне посильный труд мой; Иисусе,

освящай на Тя уповающия, освяти желания и намерения моя.

Иисусе, обещавый быти с верными до скончания века, пребуди неотлучно со мною грешным; Иисусе, Слово Ипостаси Отчей, очисти недостойное мое слово к Твоему песнопению.

Иисусе, Пасха спасительная, от смерти к жизни преводящая, всели в мя чертог Твой, просветив одеяние души моея.

Иисусе воскресший, воскреси души наша!

Кондак 13

О, Иисусе Христе, смертью смерть поправый! И сущим во гробех живот даровавый, прими в воню благоухания духовнаго сие малое моление наше, и сущим нам во гробех нерадения даруй живот вечный, да поем Тебе: Аллилуиа.

Этот кондак читается трижды. Затем икос 1 и кондак 1.

Икос 1

Ангелы воскресение Твое, Христе Спасе, непрестанно поют на небесех, и нас на земли сподоби чистым сердцем воспети Тебе сице:

Иисусе непостижимый, всех верных просвещающий, просвети и мя заблудшаго; Иисусе воскресший, всех Собою оживляющий, оживи мя умерщвленнаго грехами.

Иисусе, на небо вознесыйся и возносяй на Тя надеющихся, совознеси и мя долу преклоннаго; Иисусе, седяй одесную Отца и разделяяй славу с любящими Тя, не лиши мя славы Твоея.

Иисусе, хотяй прийти судити живым и мертвым, не осуди мя по делом моим, но сотвори со мною по милости Твоей.

Иисусе воскресший, воскреси души наша!

Кондак 1

Взбранный Воеводо и Господи, вечныя смерти Победителю, яко избавлься от духовнаго умерщвления, похвальная восписую Ти, возсозданный Тобою раб Твой. Ты же, яко имеяй победу над смертию, от смерти греховныя свободи нас зовущих:

Иисусе воскресший, воскреси души наша!